


प्रसार भारती
प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन

18.10 रविवार

दिनांक 31.05.2026



प्रमुख समाचार –

- 1– मन की बात कारीकरम म प्रधानमंत्री ह छत्तीसगढ़ म ज्ञान भारतम् अभियान के तहत मल्हार म मिले दुर्लभ तांबा पट्टिका के करीन जिकर– जशपुर के धावक अनिमेष कुजूर ले घलो करीन बात।
- 2– मुख्यमंत्री ह किहीन कि प्रदेश म खातू अउ बीजा के कोनो कमी नइ हवय।

अउ

- 3– प्रदेश म नगरीय निकाय अउ त्रिस्तरीय पंचायत के आम अउ उपचुनई म काली एक जून के होही मतदान।

.....

मन की बात-01

_____ प्रधानमंत्री नरेंद्र मोदी ह किहीन हे कि सरकार ह देस के अमूल्य धरोहर ल बचाय बर परयास करत हे। आकाशवाणी ले 'मन की बात' कारीकरम म ओमन बतइन कि ज्ञान भारतम् अभियान के तहत छत्तीसगढ़ के बिलासपुर जिला स्थित मल्हार म छठी-सातवीं सताब्दी के पांडु वंश के महर्षि बलार्जुन ले जुड़े दुर्लभ तांबा के तीन टिन पट्टिका मिले हे।

प्रधानमंत्री ह रांची म राखे गे राष्ट्रीय वरिष्ठ एथलेटिक्स महासंघ प्रतियोगिता म छत्तीसगढ़ के जशपुर जिला के घुइटांगर रहइया सौ मीटर दौड़ म रिकॉर्ड तोड़ने वाले अनिमेष कुजूर ले बात घलो करीन।

होल्ड बाईट— प्रधानमंत्री—01 (25 सेकेंड)

श्री मोदी ह देसवासी मन ले जोरदरहा गर्मी के दउरान जादा ले जादा सावधानी रखे अउ सरकारी दिसा निरदेस के पालन करे के अपील करीन। ओमन किहीन कि ए मौसम म पानी पियत रहे अउ घाम म अगर निकलना ही पड़े त, थोरकुन जतन करके निकले।

प्रधानमंत्री ह लोगन ले गर्मी ले बांचे बर आम पना, छांछ, लस्सी, सत्तू—सरबत, बेलपना, पनाकम, नीर मोर, सांभरम, कोकम सरबत अउ साले कढ़ी जइसन पेय पिये के अपील करीन हे।

श्री मोदी ह किहीन कि खगोल विज्ञान ह देस के हर पीढ़ी म जिज्ञासा जगाय हे। खगोल विज्ञान ह देस म तेजी ले लोकप्रिय होवत हे। ओमन युवा मन ले खगोल विज्ञान क्लब म सामिल होय अउ छुट्टी म तारा मंडल देखे के अपील करीन।

प्रधानमंत्री ह काशी के लंगड़ा, महाराष्ट्र के अल्फाजो, गुजरात के केसर अउ पश्चिम बंगाल के हिमसागर के आम फल के गोठबात करत हुए किहीन कि सबो जघा के आम के स्वाद अउ सुगंध अलग—अलग होथे। श्री मोदी ह किहीन कि भारतीय आम ह दुनिया के बाजार तक अपन पहुंच बनाय हे।

मन की बात—मुख्यमंत्री

मुख्यमंत्री विष्णुदेव साय ह आज रईपुर स्थित अपन निवास कार्यालय म जनप्रतिनिधि, गणमान्य नागरिक अउ आम लोगन संग प्रधानमंत्री नरेंद्र मोदी के रेडियो कारीकरम मन की बात ल सुनिन। कारीकरम के बाद मुख्यमंत्री ह किहीन कि आज प्रधानमंत्री ह जशपुर जिला के घुइटांगर गांव के युवा धावक अनिमेष कुजूर के उपलब्धि के बारे म बात करत हुए प्रदेश के युवा मन ल इही संदेस दे हे कि कम संसाधन ह प्रतिभा के उड़ान ल रोक नइ सकय। ओमन किहीन कि प्रधानमंत्री ह राष्ट्रीय मंच ले प्रदेश के प्रतिभा अउ सांस्कृतिक धरोहर दूनों के बात करके पूरा छत्तीसगढ़ के मान बढ़ाय हे।

सुनइया मन ल बतादन कि अनिमेष कुजूर ह सौ मीटर दौड़ ल सिरिफ दस दसमलव एक—पांच सेकेंड म पूरा करके नवा रिकॉर्ड बनाय हे अउ राष्ट्र मंडल खेल दू हजार छब्बीस बर क्वालीफाईं घलो हो गेहे।

खेत बचाओ अभियान

खेत बचाओ अभियान देसभर म काली एक जून ले तीस जून तक चलइया हे। केंद्रीय कृषि मंत्री शिवराज सिंह चौहान ह किहीन हे कि खेत बचाओ अभियान म खेत, किसनहा, अउ गांव मन ल जोड़त हुए एला बड़का देस व्यापी अभियान बनाय जाना चाही। केंद्रीय कृषि मंत्री ह नई दिल्ली म खेत बचाओ अभियान के तियारी के बारे म एक ठिन बड़का बइठका के अगुवई करत हुए ए बात किहीन। ओमन किहीन कि ए अभियान के मुख्य धियान खातू के संतुलित अउ सही उपयोग, मौसम के चुनौती ल देखत हुए किसनहा मन ल सही बेरा म परामर्स, पंचायत स्तर म किसान मनके सक्रिय भागीदारी अउ गांव ल सीधा ए योजना ले जोड़े उपर होना चाही।

मुख्यमंत्री-सुशासन तिहार

मुख्यमंत्री विष्णुदेव साय ह सुशासन तिहार म आज दुरुग जिला म राखे गे कारीकरम म सात सौ सैंतीस करोड़ रुपिया के आने-आने विकास काम के लोकार्पण अउ भूमिपूजन करीन। ए मउका म मुख्यमंत्री ह किहीन कि ए सबो परियोजना ह क्षेत्र म नागरिक सुविधा के बिस्तार अउ विकास ल आखिरी आदमी तक पहुंचाय के हमर सरकार के संकल्प ल अउ जादा बल दिही।

मुख्यमंत्री ह आज दुरुग म आईटी पार्क के उद्घाटन घलो करीन। आईआईटी भिलई, नगर निगम अउ राज्य सरकार के सहयोग ले बने ए आईटी पार्क ह युवा मन बर रोजगार, नवा परयोग अउ स्टार्टअप के नवा मउका के ठिहा बनही। इही मउका म पत्रकार मन ले गोठबात करत मुख्यमंत्री ह किहीन कि प्रदेस म खातू अउ बीजा के कमी नइ हवय।

त्रिस्तरीय पंचायत उपचुनाव

प्रदेस म नगरीय निकाय अउ त्रिस्तरीय पंचायत के आम अउ उपचुनई म काली एक जून के मतदान होही। राज्य निर्वाचन आयोग ह मतदान बर सबो तियारी पूरा कर लेहे। ए चुनई बर सनिच्चर रतिहा बारह बजे परचार थिरा गेहे। एखर बाद प्रत्यासी मन घर-घर जाके मतदाता मन ले भेंट करत हे।

सुनइया मन ल बतादन कि नगरीय निकाय म कुल **दू सौ चालीस** अउ त्रिस्तरीय पंचायत म कुल **तीन सौ बयानवे** प्रत्यासी मैदान म हे। त्रिस्तरीय पंचायत चुनई म नांव वापसी होय के बाद पंच के **छै सौ चालीस** पद बर निर्विरोध निर्वाचन हो गे रिहीस। जेखर बाद काली एक जून के **एक सौ सात** पद बर वोटिंग कराय जाही। उहें, सरपंच के **पंद्रह पद** उपर निर्विरोध निर्वाचन हो गेहे अउ अब बांचे **चौतीस पद** बर मतदान होही। एखरे जइसन जनपद सदस्य के **दस पद** बर वोटिंग होही। नगरीय निकाय चुनई के तहत पार्षद के कुल **इकहत्तर** अउ अध्यक्ष के **पांच पद** बर मतदान होही। नगरीय निकाय चुनई म इलेक्ट्रानिक वोटिंग मसीन यानी ईवीएम के माध्यम ले अउ पंचायत चुनई म मत पेटी के माध्यम ले वोट डारे जाही।

युवक मौत

कोरबा जिला म काली संझा तीन युवक मन उपर पेड़ के डारा गिर गे। जेखर ले तीनों झन के मउका म ही मउत होगे। बताय जावत हे कि पाली थाना क्षेत्र के चोरकादांड गांव म पानी अउ तेज हवा ले बांचे बर ए तीनों झन ह पेड़ के तरी खड़े रिहीन। इही दउरान तेज हवा गर्मा के कारण पेड़ के एक हिस्सा ह टूट के सीधा उही मन उपर गिरगे। जेमा दबके तीनों झन के मउत होगे।

विश्व तंबाकू निषेध दिवस

आज विश्व तंबाकू निषेध दिवस हवय। ए मउका म छत्तीसगढ़ के आने-आने जिला म जागरुकता कारीकरम के आयोजन करे जावत हे। रईपुर के शासकीय दंत चिकित्सा महाविद्यालय परिसर म जागरुकता कारीकरम के तहत रंगोली पोस्टर अउ रील प्रतियोगिता राखे गीस। संगेसंग दांत के डॉक्टर मन ह लोगन ल तंबाकू खाय ले होवइया नकसान के बारे म घलो बतइन।

उहें, समाज कल्याण विभाग के मंत्री लक्ष्मी राजवाड़े ह प्रदेसवासी मनले तंबाकू अउ आने नसीला समान ले दूरिहा रहे के अपील करीन हे। ओमन किहीन कि तंबाकू ह मनखे के तबीयत के संगेसंग परिवार अउ समाज तीनों बर बड़का खतरा हे। युवा मन ल नसा ले बचाय बर समाज के सबो वर्ग ल मिलजुर के काम करना होही।

संक्षिप्त समाचार

– उप मुख्यमंत्री विजय शर्मा ह आज कबीरधाम जिला के राम्हेपुर गांव म आयोजित लोकमाता अहिल्याबाई होल्कर के जयंती समारोह म सामिल होइन।

अउ

– कबीरधाम जिला के बैहरसरी गांव ले एक युवक के हत्या के मामला म पुलिस ह तीन आरोपी ले गिरफ्तार करे हे।

